

दिनांक 28.01.2025

समय: 18.45 बजे

- प्रधानमंत्री नरेन्द्र मोदी देहरादून मांय 38वां राष्ट्रीय खेलों रो औपचारिक उद्घाटन कर रह्या है—राजस्थान रा 421 खिलाड़ियों रो दल 26 मुकाबलों मांय सिरकत करेला।
- केन्द्रीय मंत्री नितिन गडकरी कह्यो—देश मांय सड़क हादसों रे कारण सकल घरेलू उत्पाद मांय बधोतरी री रेट ने सालाना तीन फीसदी रो नुकसान।
- भारत-पाक सरहद माथे बीएसएफ रो ऑपरेशन सर्द हवा काल पूरो व्हेला।
- प्रदेश रा केई हलकों मांय शीतलहर रो असर-आवता दो दिन मांय पारो उतरण रा आसार।

000

प्रधानमंत्री नरेन्द्र मोदी आज देहरादून मांय 38वां राष्ट्रीय खेलों रो औपचारिक उद्घाटन कर रह्या है। 14 फरवरी ताई चालण वाळा आं खेलों री सरुआत देशभर ऊं आया दस हजार ऊं बत्ता खिलाड़ियों रा मार्च पास्ट अर रंगारंग कार्यक्रमों सागे व्हे रही है।

000

राष्ट्रीय खेलों रा तैत 35 खेलों री होड़ों राखी जा रही है। इण मांय राजस्थान रा 421 खिलाड़ी वॉलीबॉल, कबड्डी अर निशानेबाजी समेत 26 होड़ों मांय शिरकत कर रह्या है।

000

देश मांय लारला साल व्हा करीब 5 लाख सड़क हादसों मांय एक लाख 80 हजार जणों री मौत व्हे गयी। सड़क परिवहन अर राजमार्ग मंत्री नितिन गडकरी आज नई दिल्ली मांय ग्रामीण विकास अर प्रौद्योगिकी केंद्र री ओर ऊं राखी ज्या प्रोजेक्ट अभय रा समापन कार्यक्रम मांय आ जाणकारी दीनी। श्री गडकरी कह्यो के 66 फीसदी मौतों 18 ऊं 34 साल रा नौजवानों री व्ही। गडकरी कह्यो के सड़क हादसों रे कारण देश रा सकल घरेलू उत्पाद मांय बधोतरी री रेट मांय सालाना तीन फीसदी रो नुकसान व्हे है।

000

राष्ट्रीय सड़क सुरक्षा माह रा तहत प्रदेश मांय ई भांत-भांत रा कार्यक्रमों रे जरिये सड़क हादसों री रोकथाम अर यातायात नियमों रा बारा मांय जाणकारी दी जा रही है। ई रा तैत लगातार समझाइश, वाहन रैली, शपथ, नुक्कड़ नाटकों अर दूजा कार्यक्रमों रे जरिये यातायात नियमों री पालना रो संदेश दियो जा रह्यो है। दौसा मांय आज पुलिस रा अहलकार लोगों ने फूल दे र सड़क सुरक्षा नियमों री पालना करण री अपील कीनी। ई दौरान एस.पी. रंजीता शर्मा स्कूटर- मोटरसाइकिल चलावण वाळां ने हैलमेट दीना। वे लोगों ऊं यातायात नियमों री पालना करण बाबत कह्यो।

000

उत्तरप्रदेश सरकार प्रयागराज मांय चाल रह्या महाकुंभ मांय काल मौनी अमावस रे मौके हिफाजती इन्तजामात और करड़ा करता थकों सात स्तर री सुरक्षा योजना लागू कीनी है। महाकुंभ हलका रे नो-वीआईपी ज़ोन व्हेवण रो ऐलाण कर दियो ज्यो है अर पुलिस रा 50 हजार ऊं बत्ता कर्मचारी अर अर्ध सैनिक बलों रा जवान तैनात करी ज्या है। मेळा अर ई रे आरे-सारे रा हलका मांय एआई रा बूता वाळा 328 कैमरों समेत करीब तीन हजार सी.सी. टी.वी. कैमरा लगायी ज्या है। संगम रा पाणी हेटे री हलचल

माथे निजर राखण सारू पहली दफा पाणी हेटे ड्रोन तैनात करी ज्या है। मेळा हलका मांय न्यारा-न्यारा घाटां माथे भीड़भाड़ रोकण सारू निकासी टीमां अर गोताखोर तैनात करी ज्या है।

000

बजट-पूर्व

एक फरवरी ने वित्त मंत्री निर्मला सीतारमण लोकसभा मांय माली साल 2025-26 रो केन्द्रीय बजट पेश करेला। लोगां ने ई बजट मांय विकास, नौकरी-धंधा अर माली प्रबंधन रा बारा मांय खास ध्यान दियो जावण री आस है। जैविक खेती करण वाळां किसानां ने ई बजट ऊं घणी आस है। भीलवाड़ा जिला मांय माण्डलगढ़ हलका रा बीगोद रा जैविक खेती करण वाळा रजाक मोहम्मद रो मानणो है के जैविक खेती करण वाळां ने बधावो देवण सारू सरकार री ओर ऊं साखां बेचण रो सुबीतो मुहैया करावणो चाहिजे। वे कह्यो के इण ऊं बत्ता ऊं बत्ता किसान जैविक खेती करण लागेला अर पर्यावरण ने ई बचायो जा सकेला।

000

पाकिस्तान ऊं लाग्योड़ी सरहद माथे सीमा सुरक्षा बल की ओर ऊं ऑपरेशन सर्द हवा चलायो जा रह्यो है। सिंयाळा मांय घुसपैठ अर गैर-जरूरी हलचल रोकण सारू ओ ऑपरेशन चलायो जावे है। और ब्यौरो दे रह्या है म्हाणा जैसलमेर खबरनवीस -

000

राज्य सरकार ढांढा-ढोर राखण वाळां रा ढोरां री हिफाजत सारू **मुख्यमंत्री मंगला पशु बीमा योजना** चलायी है। ई रा तैत ऐड़ा लोगां रा ढांढां री मौत व्हे जावण री सूरत मांय वां ने माली मदद दी जावे है। प्रदेश मांय चाल रह्या पशु कल्याण पखवाड़ा रा तहत शिविर लगा ई योजना री जाणकारी दी जा रही है। डीग मांय पशुपालन विभाग री उपनिदेशक डॉ. भावना यादव बतायो के मंगला योजना रा तहत जिनावरां रो मुफ्त बीमो करायो जावे है।

000

पाली जिला रा सुमेरपुर मांय 9 आयुष्मान आरोग्य मन्दिर भवन बणाया जावेला। कैबिनेट मंत्री जोराराम कुमावत आज आ रा काम री नींव रखी। ई मौके वे कह्यो के आं उप-स्वास्थ्य केन्द्रां रे मार्फत जनता ने स्वास्थ्य रा बेहतर सुबीता मिल सकेला। कार्यक्रम मांय बेहतरीन काम करण वाळा स्वास्थ्य कर्मचारियां रो मान करी ज्यो। दूजी कानी कोटपूतली-बहरोड़ मांय जिला कलेक्टर कल्पना अग्रवाल आज न्यारा-न्यारा चिकित्सा केन्द्रां रो दौरा कर र व्यवस्थावां रो जायजो लीनो।

000

ई सिलसिला मांय हनुमानगढ़ रा जिला कलेक्टर कानाराम वां रा संदेश मांय कह्यो के पखवाड़ा रा तैत जिला मांय कोढ़ री बीमारी रा मरीजां री ठा करी जावेला। वे कह्यो के कोढ़ रा मरीजां अर वां रा पिरवार वाळां सागे दुभांत नी करण बाबत् जाग जगायी जावेला।

000

प्रदेश री तीन और हस्तियां ने लारला दिनां पद्मश्री ऊं नवाजी जावण रो ऐलाण करी ज्यो। आं मांय लोक गायन मांड अर भजनां रे जरिये देस-परदेस मांय ओळखाण राखण वाळी जयपुर री बतूल बेगम ई शामिल है। आठ साल री उम्र ऊं गायन रा हलका मांय काम करण वाळी बतूल बेगम हाल ताई 25 देशां मांय वां री कला रो दरसाव करता थकां राजस्थानी लोक संगीत री विरासत ने आगे बधा रही है। साल 2021 मांय वां ने राष्ट्रपति नारी शक्ति पुरस्कार ऊं नवाजी ही। पद्मश्री ऊं नवाजण रा ऐलाण परां बतूल बेगम केन्द्र सरकार रो आभार जतायो।

000

राज्य रा केई हलकां मांय हाल ई शीतलहर रो असर महसूस कर्यो जा रह्यो है। मौसम विभाग रे मुजब आज सीकर, अलवर, करौली, नागौर अर चूरु समेत केई ठौड़ां पारो 4 डिग्री सेल्सियस ऊं नीचे दर्ज करी ज्यो। सीकर ज़िला रा फतेहपुर मांय कम-ती-कम तापमान एक डिग्री सेल्सियस रह्यो। ई बीचे घणखर शहरां मांय न्यूनतम तापमान 10 डिग्री सेल्सियस ऊं नीचे दर्ज करी ज्यो। आवता दो दिन मांय केई ठौड़ां पारो 1 ऊं 2 डिग्री सैल्सियस उतरण रा आसार है।